

VENDIM
Nr.433, datë 5.5.2010

PËR KRIJIMIN, PËRBËRJEN, MËNYRËN E FUNKSIONIMIT DHE KOMPETENCAT E BORDIT DREJTUES TË DREJTORISË SË PËRGJITHSHME TË STANDARDIZIMIT

Në mbështetje të nenit 100 të Kushtetutës, të pikës 2 të nenit 10 të ligjit nr.9870, datë 4.2.2008 “Për standardizimin”, me propozimin e Ministrit të Ekonomisë, Tregtisë dhe Energjetikës, Këshilli i Ministrave

VENDOSI:

1. Krijimin e bordit drejtues të Drejtorisë së Përgjithshme të Standardizimit (bordi i DSP-së), të përbërë nga 11 anëtarë, si më poshtë vijon:

- a) 2 (dy) përfaqësues nga Ministria e Ekonomisë, Tregtisë dhe Energjetikës;
- b) 1 (një) përfaqësues nga Ministria e Punëve Publike, dhe Transportit;
- c) 1 (një) përfaqësues nga Ministria e Bujqësisë, Ushqimit dhe Mbrojtjes së Konsumatorit;
- ç) 1 (një) përfaqësues nga universitetet;
- d) 1 (një) përfaqësues nga Dhoma e Tregtisë dhe Industrisë, Tiranë;
- dh) 1 (një) përfaqësues nga Shoqata Konfindustria;
- e) 1 (një) përfaqësues nga Drejtoria e Përgjithshme e Akreditimit;
- ë) 1 (një) përfaqësues nga Drejtoria e Përgjithshme e Metrologjisë;
- f) 1 (një) përfaqësues nga organizatat e mbrojtjes së konsumatorëve;
- g) 1 (një) përfaqësues nga Agjencia Rajonale e Zhvillimit të Biznesit, Tiranë.

1.1 Përfaqësuesit e ministrive janë në nivel drejtor të drejtorive që kanë lidhje në përdorimin e standardeve.

1.2 Përfaqësuesi i universiteteve është nga radhët e personelit të brendshëm akademik dhe duhet të gëzojë reputacion të lartë profesional e të ketë dhënë kontribut në hartimin e standardeve.

1.3 Përfaqësuesit e përmendur në shkronjat “d”, “dh”, “e”, “ë”, “f” dhe “g”, të pikës 1 të këtij vendimi, të jenë persona në nivele të larta drejtuese, të cilët gëzojnë reputacion në fushat e tyre të biznesit dhe që kanë interes e përvojë në hartimin e zbatimin e standardeve.

1.4 Anëtarët e bordit drejtues qëndrojnë në detyrë për një mandat 2 (dy)-vjeçar, me të drejtë riemërimi edhe për një mandat të dytë.

1.5 Bordi drejtues ushtron veprimtarinë e tij në bazë të rregullores, miratuar nga ministri përgjegjës për ekonominë.

2. Misioni dhe qëllimi i bordit drejtues të DPS-së është sigurimi i përfaqësimit të palëve të interesuara në procesin e vendimmarrjes, i transparencës dhe i paanësisë në zhvillimin e veprimtarisë së standardizimit, në nivel kombëtar.

3. Kompetencat dhe mënyra e funksionimit të bordit drejtues

3.1 Bordi drejtues ka këto kompetenca:

- a) Miraton strategjinë e zhvillimit të DPS-së;
- b) Miraton programin vjetor të punës të DPS-së;
- c) Analizon dhe mbikëqyr përmbushjen e detyrave të DPS-së në zbatim të programit të punës;
- ç) Miraton përbërjen, kompetencat dhe funksionimin e bordit teknik të DPS-së dhe kontrollon punën e tij;
- d) Jep rekomandime, promovon, krijon dhe mbështet nismat për zhvillimin e veprimtarive të standardizimit, në nivel kombëtar e ndërkombëtar;
- dh) Miraton marrëveshjet e bashkëpunimit që lidh DPS-ja;

e) Miraton aplikimin e DPS-së për anëtarësimin në organizmat europianë dhe ndërkombëtarë të standardeve.

3.2 Anëtarët e bordit drejtues të DPS-së qëndrojnë në detyrë deri në ditën e lirimit/shkarkimit të tyre.

Në rastet kur anëtari i bordit drejtues bëhet i paaftë fizikisht ose i hiqet zotësia për të vepruar, lirohet/shkarkohet nga detyra.

4. Zgjedhja dhe funksionet e kryetarit të bordit të DPS-së

4.1 Bordi i DPS-së, në mbledhjen e tij të parë, zgjedh kryetarin.

4.2 Kryetari nuk mund të zgjidhet për më shumë se dy mandate dyvjeçare, radhazi.

4.3 Kryetari ushtron këto kompetenca:

a) Drejton mbledhjet e zakonshme dhe të jashtëzakonshme të bordit;

b) Kontrollon zbatimin nga të gjithë anëtarët e bordit të detyrave të caktuara në mbledhjet paraardhëse.

4.4 Në mungesë të kryetarit, mbledhja drejtohet nga anëtari më i vjetër në moshë.

5. Pagesa e anëtarëve të bordit

5.1 Për çdo pjesëmarrje në mbledhje, kryetari dhe anëtarët e bordit drejtues shpërblehen në masën 5 000 (pesë mijë) lekë, por jo më shumë se një herë në muaj.

5.2 Pagesat e anëtarëve/kryetarit të bordit mbulohen nga fondet buxhetore të DPS-së.

6. Mënyra e organizimit të mbledhjeve të bordit drejtues

6.1 Bordi mbledhet një herë në 6 (gjashtë) muaj. Mbledhjet janë të vlefshme kur janë të pranishëm të paktën 2/3 e anëtarëve. Vendimet merren me shumicë të thjeshtë votash. Drejtori i Përgjithshëm dhe drejtorët e drejtorive të DPS-së marrin pjesë në mbledhjet e bordit pa të drejtë vote.

6.2 Për mbledhjet mbahet procesverbal, i cili nënshkruhet nga kryetari dhe sekretari i bordit, i cili nuk është anëtar bordi. Sekretari caktohet nga DPS-ja.

6.3 Mbledhjet lajmërohen nga sekretari i bordit, me një njoftim me shkrim, ku caktohen data, ora dhe rendi i ditës së mbledhjes. Ky njoftim i dërgohet secilit anëtar, të paktën 10 (dhjetë) ditë përpara zhvillimit të mbledhjes.

6.4 Mbledhjet e jashtëzakonshme thirren nga kryetari i bordit, pas këshillimit me drejtorin e përgjithshëm të DPS-së, kur gjykohet se nuk duhet pritur mbledhja e radhës për çështje të veçanta.

7. Marrja e vendimeve

7.1 Vendimet merren me votim të hapur, me shumicë absolute votash të pjesëmarrësve në votim. Votat numërohen nga sekretari i bordit dhe regjistrohen në procesverbalin e mbledhjes.

7.2 Bordi i DPS-së zbaton procedurën e votimit të fshehtë, në rastet kur:

a) zgjidhet kryetari i bordit drejtues;

b) hidhet në votë liri/shkarkimi i një anëtar i bordit, para mbarimit të mandatit të tij dyvjeçar.

7.3 Vendimet e marra kanë efekt detyrues edhe për ata anëtarë të cilët nuk kanë qenë të pranishëm në votim.

8. Ngarkohen institucionet përgjegjëse, të përmendura në pikën 1 të këtij vendimi, që brenda 30 (tridhjetë) ditëve nga hyrja në fuqi e këtij vendimi, të paraqesin kandidaturat përkatëse në DPS.

9. Ngarkohet Drejtoria e Përgjithshme e Standardizimit për zbatimin e këtij vendimi.

Ky vendim hyn në fuqi pas botimit në Fletoren Zyrtare.

KRYEMINISTRI
Sali Berisha